

Presidente Honorario di Cruz Cora Aruba, Su Excelencia Gobernador Refunjol ta ricibi oficialmente ambulance nobo

Proyecto a keda realiza danki na sosten di Valero Way Foundation y instancianan comercial



ORANJESTAD—Cruz Cora Aruba a ricibi oficialmente su ambulance nobo ayera tardi, y tabata trahadoman di Valero Refinery cu ta activo den Aruba Way kendenan a haci entrega di e vehiculo importante aki na Presidente Honorario di Cruz Cora Aruba, Su Excelencia Gobernador Fredis Refunjol.

Tabata for di 12'or di merdia cu e ambulance tabata staciona na e refineria Valero, pa asina tur trahado por a admira'e. Y nan tabatin tur derecho pa haci tal, ya cu tabata e contribucion di trahadonan di Valero, den Aruba Way, mas e contribucion di e compania mes, cu a cubri e gasto mas grandi pa e ambulance aki, esta 97 mil florin.

Pa 3:00 or di atardi e ambulance cu Joshmar Hoek di e Departamento Medico di Valero tras di stuur y escolta pa polis, a sali pa direccion

Oficina di Gobernador, na unda Sr. Roland Van De Linde, Operador di e area sur di e refineria, a entrega e yabi di e ambulance oficialmente na Su Excelencia Gobernador Refunjol. E Presidente Honorario di Cruz Cora na su turno a presenta e yabinan na Sra. Marieta Wanopa, ehecutivo di e cuerpo voluntario, den presencia di varios voluntario di Cruz Cora Aruba y demas miembronan di Aruba Way Foundation presente esta John Tromp, Jude Scheppard, Edwin Baptiste, Leo Bernabela, Wilgo Hoepel y Jose de Canha.

Sin patrosinador no tabata posibel pa cumpra e ambulance nobo aki. Segun Presidente di Directiva di Cruz Cora Aruba, drs. Greg Peterson, e organizacion a logra haya sosten, los di Aruba Way Foundation, tambe Valero Marketing & Supply - Aruba N.V. Ademas, Viking

Freight Services Miami, Gomez Enterprises (King Ocean), Viking Freight Services Aruba y ASTEC a haci posibel pa transporta pa y drenta e ambulance gratis na Aruba, mientras cu Gobierno di Aruba, mediante Ministro Nilo Swaen, a sostene e proyecto aki exonerando impuesto di importacion.

Fast Signs a diseña e simbolonan di Cruz Cora Aruba gratuitamente y a pone nan ariba e ambulance. Y rausquin and Sons, e empresa cu a encarga e ambulance, a duna Cruz Cora Aruba un descuento considerabel, segun Peterson.

Despues di traspasso di e ambulance na Rode Kruis, Sra. Wanopa haci uzo di e oportunidad pa entrega na Gobernador di Aruba y na representantenan di Aruba Way Foundation, un poster y un t-shirt di e campaña di

prevencion di HIV/AIDS.

Cruz Cora Aruba ta tratando di por haya 500 persona pa cana rond durante e parada grandi di diadomingo awo cu e t-shirtnan di e campaña di prevencion aki di HIV/AIDS.

Drs. Peterson a expresa hopi gratitud pa tur esnan

cu a contribui na adkision di e ambulance nobo, cu ya caba a haya su uzo. "Cu e esfuerzo hinca den dje ta bale la pena, a bira bisto durante e Parada di Flambeu, unda voluntarionan haciendo uzo di e ambulance a scapa un bida," Peterson a bisa.

